



Izjava OHR-a na konferenciji za medije međunarodnih organizacija

Visoki predstavnik na sastanku sa Predsjedništvom BiH

Visoki predstavnik i specijalni predstavnik EU Christian Schwarz-Schilling danas se sastaje sa tri člana kolektivnog Predsjedništva Bosne i Hercegovine.

Gospodin Schwarz-Schilling će ovu priliku iskoristiti da čestita Predsjedništvu na prijemu Bosne i Hercegovine u NATO program Partnerstvo za mir, da informira Predsjedništvo o posljednjem sastanku Vijeća za implementaciju mira u Briselu, te da razgovara o formiranju vlade.

Što se tiče članstva u Partnerstvu za mir, visoki predstavnik i specijalni predstavnik EU će jasno istaknuti da, ukoliko Bosna i Hercegovina želi dodatno unaprijediti odnose sa NATO savezom te na koncu pridružiti se Alijansi kao članica, biće neophodna puna implementacija dogovorenih reformi u sektoru odbrane i saradnja sa Međunarodnim krivičnim tribunalom u Hagu.

U vezi sa sastankom političkih direktora Vijeća za implementaciju mira u Briselu, visoki predstavnik i specijalni predstavnik EU će naglasiti značaj svih reformi, a posebno restrukturiranja policije, koje su neophodne za zaključenje sporazuma o stabilizaciji i pridruživanju sa Evropskom unijom, kao i pitanje fiskalne održivosti i uspostavljanja funkcionalne države.

U pogledu tranzicije OHR-a u Ured specijalnog predstavnika EU, gospodin Schwarz-Schilling će skrenuti pažnju na činjenicu da su politički direktori izrazili određenu zabrinutost u vezi sa nekim pitanjima, da će s velikom pažnjom

pratiti i ocijeniti situaciju, te da će odluku o zatvaranju OHR-a ponovo razmotriti i potvrditi u februaru.

U vezi sa pitanjem formiranja nove vlade, gospodin Schwarz-Schilling će jasno naglasiti da je neprihvatljiva činjenica da vlada na državnom nivou još uvijek nije formirana. On će također tražiti od Predsjedništva, kao jedine institucije na državnom nivou koja funkcioniра, da pokrene inicijativu da okupi političke stranke kako bi se stvorile koalicije i formirala vlada.

Potpisivanjem CEFTA-e BiH u samom središtu tržišta Jugoistočne Evrope koje je u razvoju

Danas će u Bukureštu biti potpisani jedinstveni sporazum o slobodnoj trgovini za cijelu Jugoistočnu Evropu, a Bosna i Hercegovina će biti jedna od potpisnica.

Prijem Bosne i Hercegovine u Sporazum o slobodnoj trgovini za Centralnu Evropu (CEFTA) nakon sedam mjeseci teških pregovora još je jedan veliki korak naprijed u procesu oporavka ove zemlje i integracija u Evropu.

OHR želi čestitati organima vlasti BiH i glavnom pregovaraču, zamjeniku ministra vanjskih poslova Antonu Rillu, na profesionalnom i energičnom pristupu u ovim pregovorima, koje je obilježila jasna i dosljedna usredsređenost na željeni krajnji rezultat, a to je da ovoj zemlji osiguraju mjesto u samom središtu ekonomskog regija koja je u razvoju i koja može omogućiti brz razvoj i prosperitet za 55 miliona građana koji u njoj žive.

Uz premijera BiH Adnana Terzića ceremoniji potpisivanja će prisustvovati premijeri Albanije, Bugarske, Hrvatske, Moldavije, Crne Gore, Rumunije, Srbije i Bivše Jugoslovenske Republike Makedonije, te specijalni predstavnik generalnog sekretara UN-a za Kosovo.

Današnjem događaju prisustvovat će i specijalni koordinator Pakta stabilnosti Erhard Busek, komesar za proširenje Ollie Rehn i predstavnik finskog predsjedništva Evropske unije.

Visoki predstavnik i specijalni predstavnik EU pozvao Vijeće ministara da dogovori proces revizije sa UN-om

Visoki predstavnik i specijalni predstavnik EU Christian Schwarz-Schilling pozvao je danas Vladu Bosne i Hercegovine da obavijesti Ujedinjene nacije u New Yorku o svojoj odluci da formira komisiju za reviziju procesa certifikacije policije.

Vlada Bosne i Hercegovine ima obavezu prema međunarodnom pravu da implementira odluke Misije međunarodnih policijskih snaga u Bosni i Hercegovini pod mandatom UN-a. Vijeće ministara mora osigurati da se Bosna i Hercegovina svojim postupcima ne dovede van međunarodnog pravnog okvira koji su stvorile Ujedinjene nacije.

“Ja sam intenzivno radio kako bi ubjedio Ujedinjene nacije da pristanu na proces revizije i u određenoj mjeri suosjećam sa decertificiranim policajcima,” izjavio je danas visoki predstavnik i specijalni predstavnik EU. “Međutim, Bosna i Hercegovina također mora biti svjesna svojih obaveza prema međunarodnom pravu i djelovati u skladu s tim.”

Gospodin Schwarz-Schilling je uputio pismo UN-u kako bi ih informirao o posljednjim događajima u Bosni i Hercegovini i sve većim kritikama zbog nedostatka fleksibilnosti UN-a u vezi sa ovim pitanjem.